

Visoki predstavnik se sastao s predsjedavajućim Predsjedništva BiH Nebojšom Radmanovićem

Na sastanku održanom danas u Sarajevu, visoki predstavnik Valentin Inzko i predsjedavajući Predsjedništva BiH Nebojša Radmanović razgovarali su o nekoliko aktuelnih regionalnih i međunarodnih aktivnosti, uključujući i predstojeću posjetu predsjedavajućeg Radmanovića Austriji, najvećem investitoru u BiH, koja će biti posvećena ekonomskim pitanjima, gdje će se također sastati i sa predsjednikom Austrije.

Govoreći o razvoju situacije u Bosni i Hercegovini, visoki predstavnik Inzko je ukazao na potrebu da svi organi vlasti u Bosni i Hercegovini poštuju Dejtonski mirovni sporazum. "Sedmogodišnje političko nazadovanje mora prestati", rekao je visoki predstavnik. Atmosfera u kojoj se Mirovni sporazum i osnovni temelji države Bosne i Hercegovine osporavaju "ne stvara pogodnu i pozitivnu klimu za ekonomski i društveni razvoj".

Obraćajući se predsjedavajućem Radmanoviću kao vrhovnom komandantu Oružanih snaga BiH, visoki predstavnik je podvukao goruću potrebu da BiH ubrza postupak uništavanja viškova oružja i municije. Predsjedavajući Radmanović je uvjerio visokog predstavnika da je Predsjedništvo svjesno opasnosti i hitnosti rješavanja tog pitanja.